

## **Malaysia ada hak kaji semula perjanjian airnya dengan Singapura**

**Astro Awani**

**20 Januari 2019**

**Muzaffar Syah Mallow Pensyarah Kanan, Fakulti Syariah & Undang-Undang,  
Universiti**

SETIAP kerajaan dalam dunia termasuklah kerajaan Malaysia memiliki hak untuk mengkaji semula perjanjian yang telah dibuat oleh mereka dan ini termasuklah perjanjian bekalan airnya yang telah lama dibuat dengan pihak Singapura.

Kajian terhadap perjanjian air ini perlu dilakukan kerana ia dilihat terlalu murah serta merugikan pihak Malaysia pada masa kini.

Ini susulan kenyataan yang dibuat oleh Perdana Menteri Tun Dr Mahathir Mohamad baru-baru ini yang menyatakan sekali lagi hasratnya untuk menyemak semula harga air yang dijual kepada Singapura dengan menyifatkan harga itu tidak lagi mencerminkan keadaan semasa.

Perdana Menteri telah menyatakan hasratnya untuk mengkaji semula perjanjian bekalan air yang telah dibuat dengan pihak Singapura banyak kali. Dalam wawancara bersama *Associated Press* (AP) pada tahun 2018 yang lalu, Perdana Menteri menyatakan hasrat mahu menaikkan harga bekalan air itu sebanyak lebih 10 kali ganda.

Langkah yang ingin diambil oleh Perdana Menteri dalam perkara ini adalah amat wajar kerana harga air yang dibayar oleh Singapura kepada Malaysia adalah terlalu kecil serta tidak sesuai dengan keadaan masa kini. Harga bekalan air yang telah lama dibuat ini juga dilihat tidak logik serta tidak masuk akal dengan keadaan semasa pada kini.

Perlu diketahui, air kini sudah menjadi satu komoditi penting bukan sahaja di Malaysia malah di serata dunia. Dengan perubahan cuaca yang berlaku diseluruh dunia, air sudah menjadi satu bahan yang amat bernilai.

Oleh itu, amat wajar sekira bekalan yang penting ini dibayar mengikut dengan keadaan dan suasana semasa sesuai dengan nilai sebenar air berkenaan.

Isu bekalan air Malaysia ke Singapura adalah merujuk kepada perjanjian antara kerajaan Malaysia dan Singapura. Bekalan air ke Singapura sentiasa menjadi beban politik kepada kerajaan Malaysia buat sekian lama kerana ia dianggap sebagai menguntungkan pihak kerajaan Singapura dari banyak segi.

Ini terutamanya kerana kerajaan Singapura hanya membayar 3 sen bagi setiap seribu gelen.

Mengulas hasrat Tun Mahathir terhadap perkara ini, pihak jurucakap Kementerian Hal Ehwal Luar Singapura pula pada tahun yang lalu menyatakan bahawa kedua-dua negara Malaysia dan Singapura mesti “mematuhi sepenuhnya” syarat-syarat Perjanjian Air 1962 dan Perjanjian Pemisahan 1965.

Untuk rekod, Singapura telah menandatangani tiga perjanjian dengan Johor iaitu Perjanjian Hak Air pada 1927, Perjanjian Air pada 1961 dan Perjanjian Air pada 1962.

Mengikut perjanjian semasa, Malaysia membekalkan Singapura dengan 250 juta gelen air mentah setiap hari pada kadar 3 sen setiap 1,000 gelen. Malaysia kemudian membeli semula sebahagian daripada bekalan itu pada kadar 50 sen setiap 1,000 gelen.

Seperti juga Singapura, Malaysia sebagai sebuah negara yang merdeka dan berdaulat mempunyai segala hak untuk melihatkan dan mengkaji kembali terhadap segala perjanjian yang telah dibuat dengan pihak Singapura.

Tidak menjadi satu dosa atau kesalahan besar untuk pihak kerajaan Malaysia melihat dan mengkaji kembali terhadap perjanjian air yang telah lama dibuat itu demi mendapatkan keadilan dan hak sama rata antara kerajaan Malaysia dan Singapura.

Dalam sesuatu kontrak atau perjanjian kemungkinan wujud klausa-klausa atau peruntukan tertentu yang membenarkan satu proses semakan untuk dibuat dengan mengambil kira keadaan semasa pada masa kini yang sudah berubah berbanding dengan keadaan lebih 50 tahun dahulu.

Bagi mengkaji semula perjanjian air yang telah dibuat terbabit, adalah disarankan supaya pihak kerajaan Malaysia mendapatkan semua salinan perjanjian air yang telah dibuat dengan Singapura lebih setengah abad yang lalu serta menyerahkannya kepada pejabat peguam negara untuk dikaji dengan sedalam-dalamnya untuk mengenal pasti sebarang ruang atau peluang bagi kerajaan Malaysia menilai semula perjanjian air yang sudah ketinggalan zaman berkenaan dari sudut perundangan.

Pihak kerajaan juga boleh mewujudkan sebuah jawatankuasa khas bagi mengkaji perjanjian air yang telah lama dibuat ini. Jawatankuasa khas terbabit boleh dianggotai oleh pakar-pakar perundangan kontrak seperti peguam dan ahli akademik.

Namun, apa yang paling penting di sini adalah sebarang jenis perjanjian yang dibuat perlulah adil dan saksama dengan semua pihak yang terlibat dengan perjanjian berkenaan.

Ini seperti yang sering dilaung-laungkan oleh kerajaan Singapura sendiri selama ini dalam berurusan dengan kerajaan Malaysia iaitu mesti ada suasana menang-menang dalam segala usahasama antara pihak Malaysia dan Singapura.

Laungan yang sama patut juga diguna pakai dalam isu perjanjian bekalan air ini yang sudah ketinggalan zaman ini.

**© 2019 Astro Awani Network Sdn. Bhd.**

**(535275-D) All Rights Reserved.**

Source: <http://www.astroawani.com/berita-malaysia/malaysia-ada-hak-kaji-semula-perjanjian-airnya-dengan-singapura-196478>